

Abitante Maluru husu Governu klarifika Planta LNG



Abitante Suku Maluru, Postu Vikeke Vila, Munisípiu Vikeke, husu Governu klarifika Planta LNG ne'ebé muda ba Natarbora. Imajen Tatoli/ Vitorino Lopes da Costa

VIKEKE, 12 Abril 2025 (TATOLI)—Abitante Suku Maluru, Postu Administrativu Vikeke Vila, Munisípiu Vikeke, husu Governu no Timor GAP,EP klarifika Planta Líkidu Naturál Gás (LNG-sigla inglés) ba povu afetadu Beasu.

Abitante Suku Maluru, Moises Claver Pinto, haktuir iha tinan 2023 comunidade Maluru oferese rai ektare 577 ba Governu anteriór hodi harii Planta LNG iha área Beasu, maibé to'o agora comunidade la rona tiha ona ninia prosesu to'o ona iha-ne'ebé.

“Ami hein hela Governu no Timor GAP ninia klarifikasaun ba ami, atu ami bele hatene. Se tau fali ona iha Natarbora la buat ida, maibé ami presiza husu parte relevante mai hato'o bá ami, tanba agora povu Maluru túr ho dúvida hela, katak kadoras mai Beasu ka lae. Se la mai apresenta fali bá ami atu ami bele hadi'a ami-nia uma no dezvoltamentu sira seluk iha ami-nia suku,” Moises ba jornalista sira, iha Suku Maluru, sábadu ne'e.

Moises dehan, durante tinan haat ba kotuk Governu anteriór indika área Beasu (Maluru) sai fatin protejida ba Planta LNG nune'e populasaun sira labele halo sira-nia uma no infraestrutura la tama iha Suku Maluru.

“Durante ne'e ami nunku simu programa dezvoltamentu ruma tama iha ami-nia suku, tanba Governu anteriór mak pendente tiha, basá área Beasu sai hanesan área protejida ba Planta LNG,” nia hato'o.

Entretantu, Xefe Suku Maluru, Bendito Soares, reforsa katak programa dezvoltamentu ba Suku Maluru hahú la tama dezde tinan 2021, relasiona ho planu estabelese Planta LNG iha-ne'ebá.

“Foin lalais ita akompaña liuhusi média, XI Governu Konstitusionál lansa fali Planta LNG iha Natarbora (Manatutu). Maski planta LNG muda ona ba fatin seluk no ne'e laiha problema maibé importante Governu tenke mai halo klarifikasaun ruma ba ami-nia comunidade atu sira bele hatene,” nia tenik.

Hatán ba preokupasaun ne'e, Prezidente Autoridade Munisipál Vikeke, Francisco Cruz Simões de Gonzaga Soares, rekoñese comunidade área Beasu hasoru esperiênsia moruk ba planu Planta LNG.

“Ba comunidade nia preokupasaun sira-ne'e, ha'u sei konvida Timor GAP no Autoridade Nasionál Petróliu (ANP) atu esplika ba ita-boot sira (Maluru). Karik sira la bá Beasu ka Maluru, loron ida ha'u sei bá Beasu hodi klarifika ba ita-nia comunidade kona-ba Planta LNG. Nune'e, ha'u husu comunidade tenke ho fuan malirin,” nia esklarese.

Jornalista: Vitorino Lopes da Costa

Editór: Xisto Freitas da Piedade